



表

卷之八

秩官



卷之三

師圖書  
朝藏書

袁州府志卷之八

秩官列傳

歷代循吏史有傳郡邑之志名宦必錄示勸也亦  
永思也官師文武並著於篇

賢郡守

唐

應智頊筠州建城人武德中袁州刺史時更隋室大  
亂之後智頊與民休息鎮以清淨民安樂之

房瑄字次律河南人天寶五載試給事中坐與李適

之韋堅善斥爲宜春太守瑄到郡首立學宮建文  
宣王廟於州城北門外改朔郡治修廣濟橋更名  
濟川作亭於州之南榜曰需宴公暇與民同樂焉  
累官吏部尚書同中書門下平章事上元中趙郡  
李華撰其德銘元和初刺史王涯爲之刻石柳宗  
元書其碑陰有曰縣懷其化州濡其澤凡我子孫  
罔不戴慕皆紀實也

闡瑜代宗末爲袁州刺史當兵革後瑜專務德化招  
集叛亡數年州境大理及改撫州百姓隨之先瑜  
而發吏不能止其見愛如此後拜戶部侍郎

柳渾字惟深一字夷曠初名載大曆間自江西團練  
副使拜袁州刺史均利器用昭明物則緩九賦明  
制量召拜諫議大夫朱泚亂署以爲相載羸服步  
至奉天奏曰臣名向爲賊汙且載於文從戈非偃  
武所宜乃改名渾後爲相卒謚曰貞子希玘蘇州  
刺史子孫家萬載

蕭定字梅臣右僕射瑀之曾孫以蔭起家陝州叅軍  
事金城丞蒞事清挺歷左右司郎中爲元載所惡

袁州府志 卷之八  
外遷袁潤信宋湖蘇六州刺史大曆中有司差天  
下刺史治最定與常州蕭復濠州張鑑爲第一而  
勸桑稼均賦役集徠游口在鑑復之右遷戶部侍  
郎官至太子少師

崔倕建中初詔求可爲良二千石者倕得權袁州刺  
史至官暮月以成績聞遂拜刺史

王涯字廣津元和初爲袁州刺史韓愈作詩以祖其  
行涯到官慕房瑄爲治刻其德銘柳宗元書其碑  
陰涯在郡一年召知制誥翰林學士後入相罹甘

### 露之難

李將順元和四年自員外郎出守袁州時州多火災  
且民屈負江波漑艱甚將順一日與郡邑僚屬出  
西郭門知南山水可堰命於數里外築防䟽溝引  
水入市其深濶使可通舟郡人利之目曰李渠又  
於城外西北築塘名曰益州穿渠遶州治與李渠  
接東流自宜春縣下至赤板橋縣每輸送官物得  
以舟赴郡郡人德之立祠以祀

韓愈字退之元和十四年以言佛骨貶潮州刺史進

號加恩移袁州袁人以男女爲隸過期不贖則沒入之愈至悉計傭得贖所沒歸之父母七百三十一人因與約禁其爲隸歲大旱爲文禱於城隍及仰山神甘澤立應是歲夏六月有慶雲見於州之西北進圖表賀愈在袁有賀穆宗卽位及賀赦冊后表舉漳州刺史韓泰自代狀又作滕王閣記九月名拜朝散大夫守國子祭酒十月赴闕奏乞以在袁日放免傭隸之政推之天下著爲令始愈在元和初賦詩祖送王涯爲袁州刺史有莫以空春遠江山多勝遊之句及來刺是邦謝表云州小地狹賦稅及時民安吏循閭里無事世以爲名言云宋皇祐元年知州事祖無擇始建公祠於郡庠之西明改建於空春臺下

韋建太和五年知袁州在任築開羅城二百餘間濬濠二百丈清淨爲政無所侵撓郡中大治

鄧璠高安人中和元年由尚書江西節度使權刺袁州敦學興禮民樂從之有古循吏聲凡六年詔正任

揭鎮乾寧二年以討上官逢功授銀青光祿大夫檢校工部尚書兼御史大夫上柱國持節袁州諸軍事守袁州刺史惠鮮罷瘵勸課農桑增築羅城浚治濠塹財用饒富斂不及於民

杜瑄天復元年以司空爲袁州刺史當喪亂時阜財卹民曾捐銀三百兩代民輸賦

楊吳呂師周廣林人天祐三年冬自黑雲都指揮使遷袁州刺史師周性豪率頗通緯候及兵書自云世將家子不可保富貴每恣爲杯酌醉必起舞擊

節狂歌慷慨泣下吳楊氏疑之師周不自安謂其裨將綦毋章曰吾與楚人爲敵境望其營上氣甚佳未易敗也吾聞馬公仁者待士有禮吾欲逃死於楚可乎章曰公自圖之吾頭可斷語不泄也開平初以所部兵獵境上乃奔湖南馬殷殷聞師周至喜曰吾方圖嶺表得師周足矣卽以爲馬步軍都指揮使領袁州刺史率兵攻嶺南取昭賀梧州

龔富等州殷表師周昭州刺史

按宋志云五代史師周奔楚在梁太

祖立後九國志亦云開平初然則舊志所云楊行密疑之誤也行密時已卒矣又行密亦寬仁得士



何疑於師周此蓋楊渥爾今  
但云楊氏疑之庶不失事實

王安廬江人吳順義二年累遷至袁州軍州副使除  
知軍州事以沉默寬緩爲治州民僂之修治城濠  
民忘其勞秩滿歸朝李昇受禪遷虔州節度使

張承傑南唐時爲司徒初詔監臨袁州到任闢州治  
前大街直抵神門街昇元四年詔權申報袁州軍  
州公事又奏移州廨復故基重立甲仗樓庫開子  
城街通城之西門是年召歸保太八年夏閏五月  
刺史邊鎬秩滿承傑以闔門使再除知袁州專以  
慈仁訪求民瘼課效爲最十年夏五月詔解印加  
授鎮南軍監軍使金紫允祿大夫檢校太保有謂  
承傑曰公兩任宜春葺理城池營繕公宇考制立  
事流愛殖恩凡在此者不可不書承傑曰此長吏  
之職當然耳聞者服其謙退云

劉仁贍字守惠彭城人昇元五年自黃州刺史遷袁  
州仁贍通兵書精吏事規畫有方一新州治保太  
二年詔升都團練觀察處置等使正威將軍食邑  
五百戶以示褒表後守壽州歿淮北之難贈王爵

謚忠肅詳見五代史

邊鎬任司空保太四年定楚有功除州刺史增修城堞州北廣濟橋本鄧璠所修至是爲水衝毀鎬造舟十二爲浮梁名曰永濟宜春有浮橋自此始李徵古萬載人爲尚書吏部郎中保太十年徐州刺史自唐末五年之亂宜春夏刺史凡二十有九皆武夫勲臣徵古以儒術緣飾吏事百姓安之修文宣王廟崇重儒士雖四方雲擾絃誦獨不衰

史公銖保太十三年秋七月以太保自池州團練使除袁州刺史政事練習吏不能欺廉明直幹民皆安堵時稱爲文武兼資云

呂延真以司徒自吉州兵馬都監移知袁州臨事畏慎繕修城堞深濬濠塹民有不便隨卽改革治郡四暮仍歲豐熟五年告老歸

劉茂忠安福人嗣主時授袁州萍鄉制置使旣至撫輯士庶申明法令步騎練習械具修整萍鄉與湖南接境茂忠嘗獵境上潭人來抗茂忠怒縱兵深入而還潭帥謀冬至日茂忠燕將吏必不設備遂

帥衆來寇候騎告急衆皆色喪茂忠怡然命問道設伏焚絕橋梁亭午大破之潭帥熾焉後王嘉其功遷袁州刺史宋平江南吉州刺史申屠合堅結茂忠拒守屬令堅死茂忠遂釋甲來降將入朝所籍惟州庫公物其餘軍旅科配之牘悉命焚之

宋

王懿字文德旦伯兄至道三年以秘書丞守袁州時州人頻困於火懿謂僚屬曰鄰之火無水備耳昔唐刺史李將順嘗以火故堰南山水築益州塘鑿渠引流以爲之防自是民獲安堵今渠皆梗塞當疏通之衆協力分治舊渠以通民歌之曰李渠塞王君開四城惠利絕火災未幾名還

楊侃錢塘人避真廟諱改名大雅由大常博士直集賢院知袁州修宣聖廟建講堂以授學者又建州治小廳皆自爲記侃好古執誼博學自信無所比附直集賢院二十五年不遷終右諫議大夫集賢院學士

程師孟江西轉運使袁州部盜起久不得師孟察州

吏咸爲盜地械數人於獄卽獲盜

祖無擇字擇之皇祐五年以大常博士知袁州賦性  
慈祥崇尚文教改建學宮於郡治之東招盱江李  
覲入學講說建韓文公祠修鄭都官墓卽郡圖建  
慶豐堂暇日酌酒賦詩其間創東湖臺榭與民同  
樂皆自爲記無擇爲韓文公廟碑在唐史未修之  
前革正舊史辭簡事備新史多取信焉入同修起  
厯注以忤王安石謫節度副使積官集賢院學士  
徐師閔字聖徒蘇州人學士奭之子熙寧十年以司  
農少卿知袁州時江西劇賊詹遇所過屠戮列城  
騷動袁獨預修武事具戰艦號令嚴肅常若寇至  
賊引避不敢犯境袁民歌之且有瑞粟嘉禾之異  
繪圖以進爲治鎮靜有惠愛吏民爲立生祠漕使  
蔣之奇察其治狀薦於朝畱再任在官自輔臣以  
下薦之者幾百人官至正議大夫東海郡侯告老  
以中散大夫普寧郡侯致仕有獻黃白術爲佐公  
歸老之計者公問術久乎曰五十年乃變矣師閔  
曰吾平生不妄語若欺人於五十年後豈吾心哉

年八十卒

廖子孟字獻卿元豐三年以尚書屯田郎中知袁州時太平日久慮民狃於安樂廼卽黃圃創巡檢司養兵以防盜賊仍奏置四縣巡檢一員

鄭民瞻字叔嚴紹聖三年以朝請大夫爲袁州刺史政用鉤鉅發摘如神時連歲不登乃量地里夫家衆寡豪民積穀幾何均數約直給告糴者闔四境爲一圖張之便坐而間遣使按視民免流亾之患

王古字敏仲自貳卿出守會稽成都紹聖四年謫守宜春春天性仁慈政舉綱領少間則靜坐誦釋氏書辛炳字如晦宣和二年以殿中侍御史出知袁州喜儒士每延見諸生必加勸勉會鍾碩鍾璇叔姪同登進士第炳甚喜建鍾氏所居之坊曰化成

阮閱字閱休建炎元年知袁州初至訟牒繁瀆閱乃大書依本分三字印榜四城墻壁郡民化之不踰旬訟訴稀息乃榜西廳爲無訟堂後致仕寓居宜春吟諷自適撰詩總行於世

汪希旦字周佐建炎二年知袁州增築城隍濬治濠

塹修守禦攻戰之具阮閱爲之記又建內城之西門希旦去後賊累逼城武備旣修民賴以安

王仲蕤字豐甫建炎三年知袁州會紅頭賊與趙萬繼踵逼城援兵隔絕仲蕤率衆堅守親撫士卒踰月不困賊知其不可下遁去

江公亮字元采紹興七年以宗正少卿知袁州爲治寬和慕王古爲人

吳安國麗水人宣和初進士累官大常少卿使金會金渝盟欲屈之不可曰首可得節不可奪也靖康初歸國出知袁州卒

陳煇字元光紹興九年知袁州慕韓文公爲人初廳事之西有堂名燕衍一日顧左右曰二千石當勤於共理詎可以飲食爲樂乎乃更以景韓名之刻昌黎內外集於郡庠以佐養士費從教官劉瑜請修州學廊廡齋舍張九成記

黃中字仲庸平陽人紹興中由館閣兼侍講出知袁州中之學宗程願張載與朱熹爲友往復講論嘗校藝漕闡所發策有曰平屈不以利祿入其心而

培植涵養如木有本水有源用之則迥既倒之瀾不用則甘於寂寞之濱亦足以名世任其責者誰與後熹見之曰近年此等議論令人歎服

沈昭遠字傳耀紹興十三年以戶部侍郎出知袁州舊試貢士皆寄僧舍昭遠始建貢院賦性恭儉處事公正帑庾豐實未嘗妄費四邑歲例以羨餘錢來上邑不下數十萬昭遠曰此非天降地出無非虐取於民盡緡之勑民輸義倉米倉吏違法倍斂昭遠力申明遂得減半以復舊額

王大寶字元龜知袁州會宗正丞沈清臣以詆和議貶沅道經袁大寶以同年生畱之數日僚吏懼忤時宰白大寶不爲動嘗進易詩書三經解高宗語執政曰大寶畱意經術其書可采除崇政殿說書曾攸字彥思紹興三十年以大理寺丞知袁州事隆興初元有旨江西和糴百萬轉輸丹陽時有司失於討論袁亦在列攸具不可糴狀條舉先後以聞乞先罷黜朝廷嘉而免之是邦得免和糴自攸始

陳騃字叔進臨海人紹興中試禮部第一由將作少

監歷知秀穎太平袁州召試禮部侍郎應詔條上  
時政利病拜叅知政事贈少傅謚文簡

元衡字公權吳人紹興間進士知袁州踰年改湖南  
常平利州路提刑所至清操不渝官終朝散大夫  
工部郎中

張杓字定叟魏忠獻公浚次子典州日年甫三十餘  
發姦摘伏釐革積弊百廢具舉延禮名儒崇尚文  
雅郡學明倫堂稽古閣直廬四齋皆其所建其餘  
公宇多所繕治以通直郎知州至今郡人語及張

通直猶凜凜知畏後爲兵部尚書端明殿學士

曹訓字子序自章貢移知袁州每事奉法鋤姦戢吏  
亦不少恕屬邑萬載有豪戶十武斷鄉曲不輸王  
賦物色得之盡繩以法總倉二司委郡和糴訓曰  
袁之和糴蓋屢免矣一旦開病民之端訓之罪也  
祈懇切至竟得免秩滿除直秘閣知閬州

徐傳字宗說倅大府以稱職聞知袁州慈祥廉介不  
妄費公帑漕臺下令和糴傳具以不可糴狀爲請  
漕不復強之教授林式之記其事



李詵字誠之故叅政文肅公邴之孫自黃州滿守宐  
春燭事無遁情而行之以恕正俸外例所當得者  
皆不受樽節浮費得粟二萬石別廩貯之以待荒  
歉名曰州濟倉有文筆能世其家秩將滿除夔路  
憲後爲戶部侍郎以寶謨閣待制帥廣西

丘何字漢規瑞安人爲大府簿慶元初方詆道學何  
獨疏論中庸及皇極偏黨之義會有事南郊宰相  
稱丘何嫻於禮儀遂攝太常卿行禮甚謹上將超  
擢以不肯謁當路積二年出知袁州卒

今以中字守正由軍器監丞知袁州惴惴無華廉介  
慈祥在郡以治理聞秩將滿除提舉廣東鹽事去  
之日書所得清俸白之於仰山神曰此外無一毫  
他取神其鑒之其刻厲如此

羅克開字達甫由大理正知郴州再授袁州所居鄉  
與宐春接境故吏民美惡風俗利病皆知之戢吏  
愛民事至立斷庭無留訟民稱其神明樽節郡計  
帑有餘蓄捐數萬緡爲下戶代輸夏稅一年又以  
公帑買田歲收租儲以助待補大學生路費修城

浚濠百廢具舉時洞寇李元勵猖獗羽書交馳克  
開談笑應辦不以擾屬邑人至今思之

戚如虎金華人呂祖謙門人篤於修齊之道由國子  
博士知袁州有治行受代卒

李觀字東之大常博士知袁州剖決明敏賦性廉直  
不可干以私始至郡帑赤立觀恐貽前守羞未嘗  
言及匱乏惟一意節約郡計自裕秩將滿除提舉  
本路常平茶鹽

鄭自誠字性之戊辰廷試第一爲著作佐郎出守袁  
州政先撫字飾以儒雅一月兩詣學宮講說創置  
惠民藥局病者皆得良劑民有難阨多方賜卹將  
滿召赴行在民惜其去攀戀塞途拜右司郎中

滕強恕字仁伯癸丑擢廷試第四歷爲宗正少卿出  
守袁州爲政慈祥以節用愛人爲本造平政橋置  
州儲倉除揭厥米之過取於民者惠政頗多秩滿  
除江西漕嘉定間修郡志

王棟字子東丞相淮之子爲司農少卿出守袁州天  
性儉約有同儒素政雖簡靜而馭吏時聞出威斷

人不敢玩改築貢院賴其經始焉秩滿改知泉州  
朱貔孫字興甫浮梁人以文華閣學士知袁州至則  
宣上德意戢暴禁貪興學勸士倉収民賦者恒収  
斛面畸餘貔孫令民得自槩量弊遂革陞敷文閣  
學士福建安撫使卒於袁

趙筠夫字仲禮觀文殿學士彥逾仲子彥逾清德重  
望孝宗深加眷遇筠夫以朝議大夫來守袁待士  
撫民治軍戢吏一出於誠而行之以簡靜懇餉司  
得免和糴以公帑之餘爲下戶代輸創御書閣貢  
闈仰山臺知李亭以至城郭樓櫓四門坊廡咸一  
新焉寶慶初理宗嘗問廉吏真德秀以筠夫對御  
札褒寵除直秘閣爲湖南憲

曹叔遠字器遠游止齋陳傅良門講學必以經世爲  
務寶慶二年以直文華閣知州事有大功德於袁  
民者二一曰減秋苗斛面米七千四百餘斛且令  
民自槩量而民免橫斂之害二曰浚李渠千五百  
丈餘又復龜目二井於市而民享疏泉之利修泮  
水之制倣鄉飲之禮一月兩詣學宮講說發明經

史大旨又刊止齋周禮說春秋後傳左氏章旨開  
基事要四書併發所藏書籍數十帙以惠學校興  
崇儒學他如懲器訟戢盜賊蠲關市苛細之征又  
助建御書閣爲下戶代輸修舊起廢山川城郭率  
皆改觀會旨命赴行在邦人咸惜其去云入爲太  
常少卿終徽猷閣待制謚文肅

衛湜字正叔吳人好古博學嘗集禮記諸家傳註爲  
書一百六十卷名曰集說上之官至朝散大夫寶  
謨閣直學士知袁州學者稱爲標齋先生

袁夢龍字鎮之臨海人淳祐中知袁州時轉運司下  
州和糴米以三萬斛計夢鼎言州山多田少朝廷  
免其和糴者已百年一旦開之有無窮之害事遂  
寢萬載旗甫村妖憑淫祠夢鼎撤毀之及代民不  
忍其去臥畱之旗綵蔽郊夢鼎愛其中聯曰關節  
一毫無地入公廉兩字有天知取置之歸舟後官  
宰輔爲宋名臣

趙逢龍字應甫鄞人知袁州日飯惟蔬食平恕惻怛  
施設撫諭一要之天理民彝事無畱滯民不忍欺

徐霖字景說西安人淳祐中禮部第一以著作郎出知衡州尋差知袁州踰年以父喪去哀毀號絕水漿不入口者七日

黃管分寧人朱熹門人以進士知台州先勸後禁事簡刑清移知袁州政稱治平

程公許字季與宣化人淳祐間以直寶謨閣知州事請免和糴之半令州吏總部綱運稍厚其資以免平民修周子祠葺張栻書院聘胡安之主諸生講說

方岳字巨山祁門人景定間知袁州修城作樓後兵亂州賴以守

元

朶兒其一名見敦世傑至元初以世襲袁州路宜差卒贈上輕車都尉江西權茶都轉運使廣安郡侯謚通敏子朶兒只代其職在路者三十年

張宗顏字子愚總管蒞政廉明擢九江茶鹽使

明

朱守仁徐州人乙巳年守郡是嘗府路新附兵革初

平守仁葺郡治撫殘創匡亂畧勤廉自喜撫御有方以治行聞召拜大僕寺卿于豈同官有同知孫養浩通判蔡廷秀皆寅案協恭政有成蹟養浩徵赴部廷秀陞臨江知府

劉伯起洪武初知府興學校戢吏胥有清介正直聲當干戈瘡痍之後勞來安集俾袁民安堵公之賜也以召公

楊任嘉興人母初生任有胡僧過之聞啼聲歎曰此兒異日必顯終不免刑戮耳任性至孝嗜學洪武

間由人才擢知袁州府黃子澄一見以國士許之守袁政多宜民北師起任引疾歸壬午事定子澄出徵兵往約蘇守姚善至任家與任謀求舊君圖大舉事泄任與子澄俱被擒至京磔於市任子禮坐死籍產族誅凡五十三人任姍屬發戍邊者又百餘家

周鐸鄆城人永樂中知府剛毅自與廉正有爲興崇文革姦釐弊卒於官

何澄江陰人進士知袁州和易近民時郡學火災

力議捐修建正殿東西廡大成門明倫堂翼以四齋赫然改觀尤工詩善畫

姚文嘉興人正統間由慶遠知府移袁州威嚴廉正吏不敢欺規措設施民知所向卒於官貧甚

王矩平陽人景泰初知府政體寬裕詞訟簡平以憂去民久而思之

劉懋永平舉人任南京刑部員外郎陞知府清慎勤能重刻李泰伯學記立石戟門秀江橋圮捐貲募石架屋爲梁士民德之

常顯榆社人成化間以給事中任知府蹈厲有風幹修學廸士赫有政聲官至河南左布政使

王俊字世英閩縣人戶部員外郎陞知府整嚴有大體政令明肅豪家武斷者一繩以法吏民畏憚移建大成殿新明倫堂課授生徒時臨稽閱政稱治平九載陞廣東布政司叅政

童祝字勉和蘭谿人以給事中言事左遷起爲青州知府改袁州寬簡不擾卒於官

姚汀慈谿人明敏有治才尤優於文學以事忤中官

謫福建運司同知

徐璉武邑人治郡有文武才畧修學浚渠百廢具興宸濠之變從新建伯討平袁境得帖然安枕者公之賜也今祠祀會省配文成血食

羅輅字質甫江寧人器宇䟽豁有風幹至卽均差役繕城隍置文廟樂器考正雅樂校試生徒親爲誨督作指掌圖懸之以革糧長隱射再踰年改知贛州後歷知南康南昌三府轉按察副使入爲府丞大理少卿卒

王卿山西臨縣人質實有器度知大體嚴重不苟禁隸皂不入鄉勾攝民有訟願自平者聽由是獄訟少減尤畱心學政別勤惰正難疑時廩餼士習一變轉浙江按察司副使陞叅政

范欽字堯卿鄞縣人性豪舉蹈厲有西門豹之風詰奸剔竊羣盜屏跡屬境肅然又禁妄扳民無冤濫且念袁民貧賦重力控於上得少蠲減歷任虔南副都御史

袁襲裳字子宜睂州人樸質清修蒞士御民藹然冬



日然於分宜當國時不附相門蒼頭稍犯一繩以  
恣袁故多火灾公鑄巨鼎貯水浸火星其中置宜  
春臺二王祠前火灾寢息入覲囊橐蕭然民歌惠  
政陞江西副使歷任布政使

張任字希尹嘉定縣人正直端重潔已愛民相臣柄  
國絕無倚附自其親屬迨臧獲舉斂戢不敢有越  
志者尤廣厲學校士民畏服歷任兩廣都御史

季德甫字仲修太倉州人嚴明剛斷念袁土瘠民貧  
科徵偏重力爲申請每石得減泆刻碑儀門杜後  
橫征至今袁猶頌之

劉廷舉號巨塘麻城人初令宜春以不附權要調後  
守袁州廉平仁恕威惠並著屬吏不飾簞簋者不  
稍假貸郡大饑斗米百錢公發廩捐俸復勸富民  
貸賑且爲施粥民賴以存活者甚衆申飭聖諭六  
言教民頒刻小學令諸生遵行朔望講說不輟士  
風丕變去之日有徹底澄清一巨塘之謠

鄭惇典字維勅侯官人宋萍鄉知縣鄭強裔孫也嚴  
教清慎律諸士以禮時勤課閱撤聖殿明倫堂一

新之更爲飾祭器嚴祀典盡力溝洫一切政事具  
舉僚屬士民各兢兢奉法蓋得寬仁之實云

錢楨會稽人舉進士以文章名萬曆二十一年知袁  
州豈第廉易宜士宜民不踰年以憂去後督學江  
西行部袁州建袁高士祠自爲記以厲諸生令誦  
讀其中復守湖西士民沾惠教最深再以憂行遂  
不起

黃鳴喬字啟融號友寰莆田人進士萬曆丁巳以南  
戶部郎中知袁州清心惠政治行兼優修郡學濬  
李渠新珠泉亭表黃大常廟祠先塋百廢具舉尤  
念袁賦加浮重修郡志載三百年鄉斗誤報始末  
臚列明悉今

本朝受命俯俞入告查汰浮賦寔取徵是書未可謂  
非公功也公神識俊朗雅好文章所賞拔士後多  
通顯人服其恭鑑陞河南副使子起雒領鄉薦  
王猷號在吾慈谿人進士繇惠守補袁州廉明剛決  
歷仕有聲畱心培植改府學水清建文筆峰天花  
寺疏渠備旱搜帑抵餉於士民大有裨益毀署內

淫祠置綠桺岡公餘登覽以節勞逸夏徵卓識焉  
子灝舉人梧州大守清節有父風

霍子衡南海舉人霍文敏韜之後清絕一塵布袍蔬  
食一以休息爲事郡堂火引咎修省不株究吏民  
遭時不造逆獻承突公灑血告急反以兵潰坐泐  
太官識者惜之

國朝

吳南岱字泰巖江南武進人順治己丑進士性和易  
愛士喜詩文歲癸巳以刑部員外郎出知袁州府

事時江西右布政使莊應會南瑞道安世鼎上計  
應 詔陳言請汰袁瑞浮糧下戶部議公尚未出  
都亟持袁郡志詣部言袁糧浮額狀甚悉蓋袁糧  
自明初誤編賦倍他郡民病不能支公初官刑部  
時奉 親政詔至江西卽旁采周咨具知袁民疾  
苦至是毅然力爭懇惻動人當事韙其議請 勅  
撫臣確查嗣巡撫都御史蔡公士英 疏聞卒汰  
袁浮糧十萬石甦袁民三百年重困公寔有力焉  
郡方凋敝所在榛莽公至歎曰此昌黎氏風澤之

所流被也獨不可爲治乎首進諸生講業所拔皆  
一時名雋續輯郡乘積若干卷凡城池學校津梁  
靡不修舉尤捐橋稅請禁遠衛軍裔僉運袁人德  
之治事之暇間登宐春臺化成巖與士大夫觴酌  
咏歌遠近傳爲盛事丁酉經畧洪公承疇題陞督  
糧本省公自陳脚疾詣軍前力辭願乞一簡僻地  
自効久之改守濟南袁民泣送者不絕公賦十詩  
別袁父老及諸弟子所著有公暇草等書行世

賢郡官

唐

李德裕字文饒大和八年爲中書侍郎坐論李訓鄭  
注爲李宗閔所譖貶袁州長史旣至寓郊外精舍  
卽今化成巖每杖策獨游吟咏自適有賦十五首  
詩二首窮愁志其澤謚九年六月宗閔貶十一月  
注訓等敗帝悟德裕以誣逐乃以爲太子賓客分  
司東都開成中遷淮南節度使武宗立召爲門下  
侍郎同平章事後封衛國公德裕在袁時禮遇盧

肇復後入相肇應進士見肇甚喜肇遂魁天下朱紹興間郡守邵知柔刻德裕集於郡齋

李揆字端卿隴西人累官中書侍郎同平章事相肅宗以陰何故相呂諲奏貶袁州長史後試秘書監養疾江淮者十六年元載盧杞惡之拜尚書左僕射使吐蕃還至鳳州卒贈司空謚曰恭

李景畧良鄉人初從李懷光幕府勤王屯咸陽懷光反將襲東渭橋景畧痛哭諫不聽遂去靈武節度使杜希全表言景畧遷侍御史尋忌之奏貶袁州司馬遷右羽林將軍終豐州刺史景畧居袁無所見其風槩具唐史傳中

宋

袁延度天禧三年通判袁州有能名刺史李龜從異待之州務率多委決時民新罹火延度復濬舊渠以爲備刻石記其事瀦水爲池池中築洲立亭於上名曰䟽泉賦詩以見志

李禹卿字君益由蘇州通判移判袁州會知州翁及處禹卿以其貧哀之分吳人所歸職田錢二十萬

之半遺其家於是僚屬各合錢以贖遷知澤隋二  
州官至司農少卿

李冲元字元中廬州舒城人紹聖中爲宜春司理到  
官獄訟衰息日以賦詠自娛嘗撰鞫城等銘刻石  
以傳嗜浮屠學與蘇軾黃庭堅友庭堅過郡留與  
論禪或踰月然後去乃作難禪閣銘

孫琪宣和六年通判袁州到官未幾民三罹火琪見  
袁延度疏泉亭記欲濬舊渠爲火備以告太守林  
徽之守懼勞民琪曰天下事不少勞何以久逸不  
暫擾何以長治今民困於火可坐視而不之備耶  
守服其言遂治西陂濬舊渠如故琪自爲記

鄒浩字志完晉陵人進士歷官右正言以論立后事  
竄昭州末以覃恩量移袁州監酒

汪應辰玉山人進士第一以趙鼎門人奉祀尋通判  
袁州人初易其書生徐視其政老吏不如也鼎死  
吉陽軍詔許歸葬過袁應辰祭以文曰兩登上宰  
皆值艱危之時一斥南荒遂成生死之別論已定  
於蓋棺恩特容於歸骨改判靜江府入爲侍從稍

遷至吏部尚書以忤中貴罷  
張洽臨江人爲袁州司理叅軍州獲黠盜獄不能折  
其辭有兄弟爭者洽諭以手足之誼詞旨痛切爭  
者感悟盜聞而首伏

潘傳字才甫四明人寶慶元年通判袁州甫下車攝  
郡事聽斷精明庭無畱訟吏不能欺尤加意士類  
躬蒞泮宮舉行曝書之禮又揆田入助試南宮璧  
水者之費政聲赫著七閱月新守視事協贊尤多  
人謂倅貳之賢前此罕出其右者

徐瑑字文之嚴陵人紹定三年通判袁州歲大歉穀  
價日騰瑑首議發廩錄城內外下戶八千七十九  
一家合巨室官司排日出糴二月准省劄攝守益孳  
孳荒政獎義糶罰閉糴傾州儲倉以濟常平又力  
請通融米禁全活饑民甚衆貧者給鋤病者給藥  
歿者給槨收養嬰兒踰百數民深德之列肆焚香  
立生祠以示不忘版曹以宜春產絹委市絹二萬  
瑑力控獲免他如擊豪強杜私請假神以惑衆斂  
財者盡斥去之甫一考擢守建昌邦人咸惜其去

袁州府志 卷之八  
周惇頤初名啟實字茂叔道州人慶曆中分寧主簿  
以臺檄攝萍鄉蘆谿市征局袁士受業其門者日  
衆袁人由是知學

元

嚴仲毅字伯威元初學廢教弛仲毅經歷袁州路餉  
堂舍修夫子廟剏尊經閣作南軒書院藏書閣

鄭時中字以道棨澤人任推官司讞詳明獄無留滯  
以廉幹聞

明

莫昂吳江舉人成化元年授本府同知文學優長講  
授學徒多所成就以病歸行橐蕭然

史立模餘姚人進士由給事中謫通判陞本府同知  
立模治府事政尚威嚴釐正夙弊以法繩豪武不  
得逞歲蝗命捕之以米斛易蝗一斗蝗遂盡迺馬  
差困設四季馬甲法以節逸勞著爲令所至登眺  
賦詩陞惠州知府

林富字守仁莆田人初授大理寺評以事忤逆瑾謫  
潮陽丞尋勒致仕瑾誅起袁郡丞在任操如介石



唯求民安事輯絕亡他營所至有水蘖聲歷陞兩  
廣都御史兵部侍郎

梁奎順德舉人正德五年通判袁州值姚源賊起率  
兵討之死於敵此以死勤事所當請祀者也

鄭宣化南直人進士嘉靖丙寅任推官潔已愛民孤  
介不阿獄有枉濫輒爲平反尤加意採訪揚激墨  
吏屏息士民慕之

陳端言海陽舉人萬曆辛巳任推官沉靜清嚴惠威  
並用民以訟至細心剖決吏胥不得關其口署宐  
春時庫吏盜金錢事覺必置于理毫無假借一郡  
肅然

葛焜上虞人倅建昌水蘖自勵陞袁州府同知清廉  
愈著衛官餽遺以求市用者盡卻之有詩文名致  
仕去

董三畏嶧峨人舉人萬曆丁亥任推官慷慨介特署  
分宜萍鄉篆所至有廉名時有司利民折解自肥  
悉禁革歲省里甲千金以艱去民遮道哀送

楊秉鐸貴陽舉人萬曆己丑通判袁州潔已自好兩

督南糧卻常例不受署宜春以平等徵收有稍欠分釐者置不問陞任去民爲立碑歷官雲南副使徐之孟字養浩德清人進士萬曆甲午任推官愷悌清潔善詩文讞決多平反革保犯皂役不得殘民衙舍蕭然命蒼頭闢畦蒔蔬袁城地勢南下搆珠泉亭以壯形勝性介直不阿僅轉永州郡丞

王隆德烏程人進士萬曆三十二年任推官才識雅肯任事尤嚴剔嘉時撫按行部以條鞭之外復有值櫃收銀南糧民解爲里甲困擾及衙門供應取辦地方民有兩條編之謠因檄公與建昌司李陸公鍵條議量加四差一切錢糧俱官解僉點吏書值櫃經收及各公署損壞什物置辦俱官給修補供應夫馬悉給驛傳不許假借幫解各名色私派里甲請著爲令有犯者撫按叅奏一時稱便

毛文煒吳縣舉人萬曆四十二年任通判清而有文署府縣凡事不擾科徵有法暇日卽與士大夫講學詢利病士民稱之遷莒州知州

侯世屏字伯憲號明喬江夏舉人萬曆庚申任同知

蒞事勤敏修學增城先後署府縣篆興利剔害及  
飭譙樓拓縣獄郡人稱之遷部郎太

王相說字懋弼號鞠劬泰州人進士天啟三年任推  
官廉以持已明以課士修學講約訟不勾攝士民  
翕然以考最擢御史

吳鼎元廣東舉人崇禎癸酉任推官署宜春縣事時  
戶胥藉口補平私派幫解發覺痛懲申請禁革勒  
石縣門

孟道弘江夏選貢辛未年判袁州風槩秀美雅志緩  
靖自督南儲卻常例羨餘琴尊蕭然尋擢西安郡  
丞歷官兵憲

陳瓚號直洲鎮海人進士崇禎丁丑任推官才氣英  
發遇事敢斷是年冬楚寇攻袁鄉紳袁業泗謀獲  
內應公同心主持斬之城上賊謀用沮拒守半月  
與紳士悉心效死城賴以全遷戶部太後死獻賊  
難

丁聖時字墨巖巴陵人進士先令溧陽坐仇誣左遷  
崇禎戊寅司理袁州盡心讞決風采凜然嘗申革

宜春縣私議補平酒亭馬戶之幫解建設喝斷關  
以遏萍衝郡人德之已卯分校省闈所得多名士  
遷戶部太

李時與號念劬福清舉人崇禎甲申以臨江郡丞改  
袁清忠性成畧無矯飾問學淹博與諸生言亶亶  
不倦要歸於忠孝尋署府事誓與地方存亡乙酉  
七月二十五日守將蒲纓兵潰楚帥黃朝宣五營  
鼓噪西奔公號泣挽援不得八月初一日於萍鄉  
公署具冠帶自縊一僕亦隨死

廖文英號昆湖廣東連州人選貢除南康推官改袁  
州署知府事英斷有才畧時袁遭獻左慘殺公撫  
恤孑遺天井賊未靖悉力鎮定民賴以安條議清  
糧懸軍二事極痛切會時亂阻格重刻郡乘培植  
學校乙酉春以毋憂行識者歎之

國朝

晉國璧號連城全椒人拔貢乙酉春以推官至值  
鼎定携府印匿民間旋奉檄知府事時兵多縱殺  
庚癸火急公極力調停曲事諸鎮將丐其止殺存

恤所全活頗衆

劉鏞號木菴祁州人拔貢順治己丑春自濟寧州守同知郡事郡初恢復環城皆兵巷無居民署鎮貪橫日夜困索諸紳士動輒械繫人心洶洶公力爲排解或不聽則毅然爭之多所全釋嗣推官王公延禔至與公同志爲地方請命有不獲者王公昌言於上必得當乃已地方如出湯火十月奉檄視府篆益加意保釐剔嘉戢兵飭貪禁暴正遠軍之誤核衛弁之驕嚴營將之強糴清逋賦之株連及申繳文武各臺司市米之金散鹽之檄有人所畏縮未敢爲者公行之無難色七年以前任計典改官行士民扳轅泣送至今思之

賢縣官

唐

唐萼武德間令萍鄉始建學於縣南寶積寺左祀名

宦

宋

程元白博野人太平興國初進士知宜春縣所至惟  
隱恤無赫赫聲後以子琳相仁宗朝累贈太師中

書令

王揆著作左郎知分宜縣丙午夏雨水公私廬舍墊

溺揆修葺廨宇建大門長樓規畫營建皆節縮煩  
費不歛之民間僅踰月而罷

張補之治平間知宜春縣慈愛被民縣人朱景陽有  
頌張君侯詩

胡安老建安人紹興末知宜春縣政先撫字無聰察  
苛刻之政去後民立生祠

龔輿湘陰人乾道中進士知萍鄉縣以已俸代民逋  
賦後爲提刑檢法福建運幹皆剛介矜廉卒無餘  
貲

柯春卿閩人知宜春縣吏事精刻聽斷不辭勞始建  
縣學秀江之北後判京府亦有聲

薛紹字承之永壽人進士知宜春縣治頗稱最擢知  
真和二州歷直秘閣卒

狄棐字輔之長沙人進士以大理評事知分宜縣歷  
開封府司錄判益州所至政先愷弟不表暴取聲  
死之日家無餘財語具宋史傳

郎簡字叔廉臨安人隋州觀察推官服除引對真宗  
日郎簡歷官寡過乃無一人薦之是恬於進者特

改著作佐郎知分宜縣歷官至尙書工部侍郎語  
具宋史傳

張錫字貺之漢陽人進士大中祥符間試校書郎知  
南昌縣改萍鄉清方敏默爲善不倦恒歛晦不矜  
歷侍讀學士右諫議大夫贈工部侍郎

唐謨熙寧初以寺丞出知萍鄉縣修學校訪耆儒親  
執經講說學池中瑞蓮生是年州貢士四而萍屈  
其二高無黨蘇方叔彭襄

張希顏景德間知萍鄉縣驛傳橋梁修葺野無惰農  
肆鮮賭博市易不喧夜更鼓分明殿直范延賞過  
之後經金陵守臣張詠訪南中吏治得失延賞以  
希顏對詠曰希顏固善天使亦好官員也並疏薦  
於朝

黃大臨字元明分寧人庭堅兄紹聖中知萍鄉縣爲  
良宰庭堅南竄以省兄至袁書縣壁廳記

鄭強字南美福建三山人宣和五年由國子博士知  
萍鄉縣相傳縣民素多目疾強以縣治乃飛鳳形  
因鑿二池於縣前百步內以象二目於是人無目



疾又築陂于蘆谿溉田五六里號鄭公陂民深德  
之後爲廣東提舉

徐昇紹興三年知萬載縣時寇陷江南所在盜起州  
縣焚毀民不聊生昇請濟師討定凶殘重建縣署  
境賴以安

趙師處字學古朱熹門人紹熙間知宜春縣勤撫字  
慎催輸貧病者收卹之賓客資贈悉輟月俸爲備  
卒於官無以爲斂

謝諤字昌國新喻人淳熙中知分宜縣縣積負州錢  
數十萬而歲常賦外又征緡錢動三萬餘諤歎曰  
桑弘羊復生不能矣乃疏言其弊免之以憂去後  
爲監察御史猶奏減分宜月椿錢官至煥章閣直  
學士

許及之字深甫永嘉人淳熙中知分宜縣未赴任奏  
免縣積負十七萬緡後陟官去猶請減縣月椿錢  
後知樞密院事

何異字同叔臨川人淳熙間知萍鄉縣延訪儒術聽  
訟得情事多矜恕丞相周必大叅知政事畱正擬

試之院轄奉宗問異經列薦否必大正以萍鄉政  
聞稍遷國子監簿擢監察御史積官至工部尚書  
好吟咏有月湖集

王謙字弱翁臨川人淳熙間任萍鄉縣知縣時黠吏  
姦民持權相爲表裏謙至盡革前弊紀綱一新建  
飛詠樓及勞拙堂有記并詩後爲持憲郎民永懷  
之

孫逢吉字從之龍泉人淳熙間知萍鄉縣以儒術飾  
吏治榜講堂曰崇勵刻石曼卿所書經史於上訪  
民疾苦輟已俸置社倉二以備歲饑歷官吏部侍  
郎

祝勛衢州人淳熙中宣教郎知萬載縣是時學宮廢  
監示者竊據其址學官生徒顧寓僧舍勛乃復舊  
址建學政教宣敷

錢文崇德人進士爲當塗縣尉捕販私茶商數十人  
訟當進秩文辭不屈後知萬載縣事益茂能聲遷  
知循州官至朝奉大夫

王僎紹興人嘉泰初知萬載縣發豪民易谷梁之惡

逮赴詔獄姦猾屏不敢肆

林景達嘉定間知萬載縣蒞治以誠民不忍欺卒於官縣人哀之

冷應徵字公定分寧人寶慶間知萬載縣修學舍招俊秀講肄經術旌其通經飾行者以勸歲饑棄粟盈道恣民收養令所棄家不得復問全活者衆葉夢鼎列其治行以勵他縣積官至直寶章閣主管廣南東路經畧安撫司公事知廣州

明

杜谷珍太平繁昌人洪武初知萍鄉州兵革甫息州治榛蕪珍招撫流亡立舖舍勸耕織百姓安之及改州爲縣蒞事如初未幾卒於官民懷其惠葬邑

南子孫因家焉

縣志作  
適珍

趙中字允中懷寧人洪武初萬載知縣亂後民無寧居中勞來撫輯民歸如市初年戶不滿百後至七百餘戶遂置坊廂立公署建譙樓廟學

張仁黃州人洪武初分宜知縣開創縣治力不勞而事集民復安全

仲時舉洪武間宜春知縣開建縣治施設有方兵革  
之後招撫流亡百姓安之

趙彞洪武間萍鄉知縣招流亡撫孤弱建公宇百餘  
間設施措置民不知勞

李順英西安人洪武間萍鄉知縣修縣治遷城隍重  
建學校興人材創壇壝橋梁民稱頌之

賈志通淮安人洪武五年萬載知縣初知縣趙中建  
廟學未備志通至捐捧首倡民協成之且躬校生  
徒稽閱程課以秩滿去

戴備訥西安人洪武六年分宜知縣公勤廉慎作學  
校新橋梁秩祠廟使民以時任滿去

陳繼宗常州人洪武末分宜知縣撫字有方催科不  
擾陞吏部郎中民思之

束清丹徒人洪武甲戌以人才授萬載知縣慈愛廉  
介儉以自奉民或逋租負不能償者自鬻衣帶代  
之祀名宦

舒仲誠貴池人革除末太學生萬載知縣爲政嚴明  
處斷平允招徠逋竄勸富室貸之穀種農具僦以

房舍勿收其息民翕然歸之嘗月朔謁廟里婦有  
燈晨績者賚之米布民由是相勸於勤擢湖廣按  
察司僉事

蔡胄四明人進士永樂間宜春知縣治太威刑政先  
德意民自服其化以憂去

何正武城人永樂六年萍鄉知縣盜李泐良亂湘潭  
醴陵間不靖正以袁軍討平之築斂陂灌田數十  
百頃民歌曰寇至侯禦之民饑侯食之

汪悠久餘姚人宣德四年為縣知縣法制嚴整明察  
細微縣連賦有至六七年者民流竄過半悠久奏  
免之省今安業公署學校祠廟整建一新又表樹  
於各壇隣邑寇熾定計追禦

周瑛嘉定人正統初分宜知縣初歐祥內附以鄉量  
作官則上之每畝科米一斗六升外帶夏稅而官  
米科尤重民由是逋且困瑛疏其事於朝曰臣以  
儒生悞膺職任所治之縣實隸袁州壤土至卑提  
封極小按行都鄙竟日可周及查歲額田糧動四  
萬九百有奇逋賦連年不勝困弊蓋緣山多田少

地促人稀雖遇豐收未能足食乃至秋糧原額科  
派獨加緣洪武年間按籍起則行之至今遵承舊  
制袁民每當上納時分織造寒暑苧棉從安慶等  
府地方貿易米石以代秋租比年米貴糴納不敷  
萬口嗷嗷拖欠益甚臣竊惟分宜境接新喻上高  
安福廬陵等縣其糧起額民田一畝僅取五升以  
上袁州一府地產未及新喻以下而分宜等縣田  
糧每畝帶夏稅一升六合秋糧米一斗六升而零  
官田一畝帶夏稅不盡五升秋米四斗四升有畸  
比之新喻等縣實幾已三倍糧稅力役不勝繁多  
展轉流離半填溝壑固其所也見奉戶部勘合爲  
折收布疋事備仰炤例督民織造布疋解納凡棉  
一疋折米一碩苧一疋折米七斗各解部收用輸  
納極便今分宜各縣田糧比之鄰境委重二倍如  
蒙准奏乞勅戶部將本府田糧依新喻各縣起科  
其五升三合之外并重額官稅詳炤見例折納布  
疋上不失官之稅下可裕民之生糧亦易完民蒙  
輕省袁人方來室家之慶皆雨露生成之恩臣保

障功微催科政下冒干天聽無任悚惶詔可之袁  
民至今戴德不忘

李璨福清人進士正統六年萬載知縣寬猛得宜獄  
訟簡少月朔望詣學勉勵生徒蠲其徭役由是翕  
然知學都御史韓雍薦之朝陞衡州府通判

施琦正統間以監生丞萬載盡心職務邑水險峻兼  
陂堰梗流賦運常苦覆溺琦請定每稅一畝科徵  
本色米五升二合存留餘折徵銀布民甚便之

吳江宣城人景泰二年分宜知縣興學勸農佑良抑  
暴民戴之如父母都御史韓雍薦江才堪理劇移  
知福清民留之弗得

吳瑄山陽人進士景泰七年分宜知縣釐革夙弊門  
不關鑰而請託私謁無一敢至者稅糧申派折色  
歲辦里甲均平訟不勾攝令投牒者自拘無敢不

至徐決以片言皆服天順六年召爲監察御史  
邢廷禎金華人賢良方正爲廣州經歷擢萬載知縣  
明敏平恕民之笈獨者撫卹尤切民苦餉官馬亟  
請諸公府極言其不堪始得免累

陳璨海陽舉人成化間知萬載縣宇良擊奸積粟賑  
貸加意學校修葺廨宇歲旱引咎懇籲即大雨在  
縣五六年境內肅然

陳瑤字仲華全州人進士成化間萬載知縣達民情  
釐吏弊勸農興學訟簡徭清陞監察御史歷通政  
使轉都御史

莫立之字斯立錢塘人進士分宜知縣寬慈有恩修  
學築城建倉造橋具有成緒擢南京監察御史陞  
四川按察副使

郭維臨海人進士宜春知縣廉明有威廢墜多舉吏  
不敢欺擢南京監察御史累官布政司叅政

曹忠字原孝江陰人弘治初分宜知縣興崇學校引  
拔生徒新縣署修使館道路百廢具舉民不知勞  
部使交薦之官至工部郎

吳蘭字佩之崑山人進士分宜知縣仁厚謹廉歲徵  
耗羨吏白應得者叱去之爲市穀置萬石倉以備  
賑糧長征民類加耗銀蘭令民得自至縣廡下秤  
取弊遂革考績忝擢南京監察御史卒



應昌仙居人分宜典史赴官不挈家自隨有清苦聲  
子良舉進士爲翰林編修昌贈如其官

張時孜鄞縣人進士萍鄉知縣律身謹嚴門無私謁  
晨興視事至夜分不輟殮寢爲廢以病入覲卒

韓憲蕭山舉人萬載知縣有治劇才剛果敢爲方痛  
懲豪右之害民者會得疾卒

張參華亭舉人宜春知縣敏辨有吏才民苦糧長下  
圖徵收參設局縣門立十限法置衡量令民以次  
輸入竟不費而事集歲饑令富民發廩賑之官爲

給粟俾秋成加粟以償後陞工部主事

陸璫蘭谿舉人萬載知縣豈第有爲巨豪爲盜者璫  
雉翦不遺力歲饑民多逋負移檄交至璫卽自械  
繫民咸願身代璫曰父老毋自苦吾寧以此去無  
忍爾輩流離也勸課學徒撫存孤寡皆心誠惻怛  
後以謫調民痛哭遮畱至今猶思慕之

嚴鳳歸安舉人分宜知縣敷政以寬便俗宜民身守  
儉約敝衣蔬食部使至督糧急鳳請身爲之繫以  
需征期立傳箭遞發以探警報居七年稱治陞南

昌府同知歷鎮遠知府卒

凌汝志太倉人宜春知縣廉明多惠政嘉靖乙巳饑捐俸賑之丁未旱禱名山雨應遷給事中至順天府丞祀名宦

徐棻字世寅常熟人進士令宜春蘇里禁誣清傳節餉滌除煩苛與民更始建藏書閣新啟聖祠學基旁齧於民者悉還之校士拔其僞館昌黎書院三載拜南御史後巡撫江西歷官工部尚書詳張春生祠記中

陳鵠武進人進士分宜知縣沈涵恬澹周知民隱徵収令民自輸投櫃禁里長勒索人覲後庫失金累典守鵠廉得真盜寘諸辟一縣肅然官至憲副湯日新秀水人進士嘉靖間分宜知縣明爽愷悌清徹無染時宜春分宜爭石山界親履境上剖析公平兩縣民交頌之尤嚴衙蠹杜請謁民愛信焉擢給事中歷官通政

許從龍崑山人進士嘉靖中分宜知縣清風矯時惠心及物民以訟至必婉轉開譬令其自服催科無

擾民傳頌之

胡應嘉沐陽人進士嘉靖間宜春知縣察奸剔蠹幽  
隱必矚日與諸生論行攷藝其所獎與驗若券符  
廉能聲大著擢吏科歷陞都給事中

楊自治字以善崇慶州人嘉靖間合萍鄉廉勤公謹  
歲省里甲浮費數十金革錢糧包攬積弊逋負一  
清修學繕城置橋梁立社倉裕民儲蓄時有流賊  
之警特創關管用資保障因科名久乏訓養諸生  
指授經義凡五載陞本府同知歷官刑部員外郎

雲南按察司僉事

蔣時謨全州舉人嘉靖中萍鄉知縣急撫字緩催科  
修城池建書院歷五載陞武岡知州長沙府同知  
黃思近南安人進士嘉靖四十二年分宜知縣沈凝  
簡重平賦輕徭與民休息時相國家數以縞帶緋  
衣暮夜饋之不受且曰吾布衣安用此歷官雲南  
叅政

王貽德全州人進士嘉靖末分宜知縣廉以褫躬方  
以事上聽訟剖決如流布衣蔬食愛民如子後憲

臬兩蜀袁士有官屬下者尤懃懃問鈴陽疾苦弗  
輟歷官貴州叅政

馬千乘平湖人進士隆慶二年分宜知縣明敏果斷  
勤恤民隱凶歲發粟蠲金親覈貧戶給之冒領者  
罪之以故全活者衆庫役盜銀事覺憐其母老責  
償免其遣其廉恕如此歷官廣東副使

趙日新晉江人進士隆慶六年分宜知縣會檄賣嚴  
相籍沒產牘版繁錯黠胥乘以漁利日新受簡一  
日無遺寸田尺宅莫敢隱通邑咋舌性峻潔徵賦  
聽民自署多寡投櫃無溢羨又革押班役最便民  
鞠訟明晰有某甲子愚鄙奉母不能得歡母驟病  
卒里人以懃逆誣日新從郡城歸過其里假寐輿  
中若見婦人爲子訴甚悉亟呼訊之爲昭雪它摧  
奸白枉多奇政後爲奸民造蜚語左遷旌德諭邑  
人寃之稍遷至工部員外郎父諱恒初成進士嘗  
爲袁教授手所得士日新至皆兄弟視之但不可  
干以私家傳習麟經暇卽舉示諸生一時袁中頗  
有能說春秋者署中生一子名世徵乙未進士號

鈐圖志不忘宜也

徐一唯蘄水人進士隆慶五年萬載知縣沉毅果決  
置學田以贍師生定瀏陽豪戶爭廣洞田地之亂  
勦大圍山巨寇李大鑾等民賴以安陞南戶部主  
事有生祠

陸世勛邳州舉人萬曆二十年萍鄉知縣精明果斷  
愛士恤民捐俸修理文廟并置書籍學宮修縣志  
建占鰲閣縣例炤米編差除米折銀肥已勦僉差  
之後餘米盡蠲不受

蔣應震宜興人進士萬曆十一年宜春知縣正直不  
阿釐奸除蠹捐革火耗校士以文有私干者輒曰  
此陽鱗也斥之月再課士親定品題乙酉分闈中  
式皆名士戊子秀江橋北岸傾圮卽募匠修築捐  
俸六百餘金起種桃亭於春臺作篔簹亭於化巖  
五年行取擢南禮部主事歷任有聲長子名如奇  
亦以名進士著令德云

黃洽中長沙人進士萬曆十七年宜春知縣剔蠹除  
奸一意恤民錢糧令民自封投櫃不索羨已丑大

荒悉心賑救開倉借貸貧生各給穀一石秋間自  
買還倉計五百餘石建文昌閣於縣學左一月兩  
課士彬彬向學調樂平擢刑部主事

畢懋良號見素歙縣人進士萬曆二十三年知萬載  
縣邑接壤瀏陽民苦公賦多逋逃公捐夙負給牛  
種墾荒遂稍還集南糧解戶傾產賠贖公僉南布  
並解謂所發布價可營息以此均其役他如立社  
倉革火耗給兵役以抵荒糧裁樣鹽以足鹽額禁  
差船以恤船戶課士修學尤多善政邑佐市物不  
平價輒以官評太之自甘清苦日惟食豆粥家人  
不能堪邑諸生張紹渠頌公詩有二云買牛給種桑  
麻盛捐俸空囊豆粥香人以爲寶錄擢南吏部主  
事父老奔走泣送歷官工部左侍郎

馬孟禎號皖完桐城人進士萬曆中分宜知縣方直  
端廉待士以禮平賦輕徭不事威嚴而風移事集  
擢監察御史歷官大僕卿

錢文薦號石樓慈谿人進士萬曆四十一年知宜春  
縣歲凶民饑公軫恤調停追徵得法民獲甦息注

意校士獎拔名俊然無敢于以私者著有羅霄集  
石樓文集陞工部主事

姚繼舜號虞廷桐鄉人舉鄉試知萬載縣不以妻子  
隨唯奉父蒞任父八十矣刑罰悉從輕省至訊重  
獄必詣城隍祠對神勘詰而愚民輕生或吞毒草  
立死公嚴禁之風稍息萬曆午未間歲饑疫痢交  
作公發賑不足復設粥置醫藥全活甚衆櫃嘗失  
銀人皆指庫吏公不爲詰夜夢一青衣女子伏其  
前後獲盜果彭好也至葺學宮修預備倉令不受  
水患捐俸修康樂橋復買田歲取租入爲修橋之  
費勸農息訟嘗書一聯於儀門曰鄉井有田宜早  
種縣庭無事莫頻來邑民久而思之陞工部知高  
州府

王家賓號獻廷漢陽舉人天啟初宜春知縣敏迅機  
警能察奸搃伏剗建文筆峯爲一邑振起人文

韋明傑號青岑烏程人進士崇禎二年萬載縣知縣  
偉幹豐儀以文學飾吏治邑有大利害輒條上與  
章報可乃已修縣志綜練該洽以考成不及去任

地方惜之

曹國祺號介之全州舉人崇禎辛未壬午先後兩令分宜用意撫字清標雅度初終不渝

程之敦黃岡舉人崇禎六年知萍鄉縣撫字催科精明渾厚丁丑流寇潰城請兵救全袁郡人皆感誦

朱茂暲字子莊秀水人崇禎十四年令宜春年特英妙精勤蒞治剔奸戢豪有老吏所不如者而革酒

亭一議更爲便民性喜延攬時與諸士課文品題竟日無倦色調贛縣未行遭獻逆潰城去官尋署

事候代兩至天井窩拮据招安解散餘黨渠魁授首寔公之功也迄無直之者

劉道南號大和江南籍遼東人舉人乙酉年令分宜時方多事公一以誠信慈祥爲治民苦兵餉設法

以紓重困歲值旱稜發廩賑濟興利除害以隱德及人者尤多

陸天祚浙江人崇禎十五年任萍鄉主簿癸未冬獻賊陷萍被執賊首張化龍脅降天祚曰主簿降何

益於西府時賊自號西王府也賊怒囚之七日終不屈遇害



國朝

王忻號燕皇章丘人進士順治二年宜春令恂恂豈  
第蒞任朞年江西變公去官又一年復任時軍興  
旁午鎮兵驕悍饋餉稍後輒喧噪入署公不勝下  
怒催科頗峻然浮糧一節獨公留意在任七年每  
臺司新蒞卽縷縷請命且引新喻上則比例卒邀  
藩撫入告炤則清汰公之首事勞勩未可泯也十  
年改選去官舟次新喻卒遇兵害惜哉

江載清號子厚黃州舉人順治壬辰分宜令公天性  
清整方以事上不顧誚責獨問民疾苦輕徭薄賦  
禮士校文一變前令侈橫之習鈐俗稍定方朞月  
以過瘁暴卒囊無餘金推官王公延禱首爲倡膊  
乃得扶櫬旋家袁人士皆爲流涕

賢學官

宋

張綱字仲舉嚴州人少游大學長於書人目爲小張  
綱紹興七年爲州學教授大守江公亮同里人也  
以鄉先生呼之州學故有稽古閣講堂皆朽壞綱  
撤而新之

胡時字伯止樂清人師事止齋陳傅良盡得伊洛之  
學操履有守登乾道第授迪公郎袁州教授風姿  
粹美初得第雖貴欲以女妻之且示以奩具之盛

時辭曰老姑家貧會以女許嫁不敢背約

羅開禮字正甫永豐人以進士爲袁州學教授文天祥起兵勤王僻開禮知永豐縣事與統制鄒鳳連兵復吉贛諸州後兵敗於空坑爲元將李恒所執不屈死家變於賊天祥哭之甚哀

元

周聞孫字以立吉水人舉於鄉爲路教授馮寇至倡義兵守城與有功

明

陳定山陰舉人授府訓導躬勤舉職出其門者皆名士以文推輯府志屢爲考試官遷分宜諭

林禎莆田人宜春學教諭秉心貞勤嘗出已俸助諸生膏火卒於官

董匡番禺舉人永樂間萬載學教諭博學洽聞風儀峻整尤工吟咏縉紳多推重之擢監察御史

朱憲山陰人萬載縣學教諭同學該博軌範矜莊善訓迪士官至南康府同知

向欽慈谿人宜春學訓導端謹善誘旁郡邑暨從宦

者皆來學貧者量資給之所著有舉業權輿東西  
銘註感興詩釋陞新淦縣學教諭致仕

郭大治番禺人萍鄉學教諭克端模範嚴課會賑貧  
生苦節清修士誦慕之祀名宦

林同晉江舉人萬載學教諭少從蔡清學渾素朴雅  
剛正無所回提學邵銳重其行嘉靖壬午聘克湖  
廣分考明年陞金華府授後有訓導羅聰桐廬人  
操履清慎吳蒙崑山人任氣節聞善若出諸已萬  
載士並譔慕之

趙恒字志貞晉江人進士任袁州學授博學尤邃於  
春秋古誼自持卻贖貸貧與諸生日勤講議爲士  
所推重著有春秋錄疑等書行世歷南京戶部郎  
中轉姚安知府告養歸

徐樞淮安舉人任袁州學授溫厲端雅正已率士絕  
口不言贖至關行已彛常事毫不以徇

王廷稷晉江舉人任萬載諭性資篤厚韞藉閎深躬  
率諸生摘文至分俸給筆札士德之後遷營山令  
擢南京監察御史歷雲南叅政

許持謙信豐人貢士教諭分宐端方博大取與不苟  
諸生初補員及餼廩執贄皆不校年七十致仕  
李一色臨川舉人分宐學諭有幹局釐正本學風水  
豁然改觀竟以勞瘁卒諸生勒碑儀門

國朝

武勳

明

歐祥一名普祥初事僞天完徐壽輝爲將至正壬辰  
祥陷袁州壽輝以祥統兵守禦其地庚子五月陳  
友諒殺壽輝僭稱帝祥屬焉然耻友諒所爲不樂  
爲用辛丑八月明太祖帥師討友諒拔江州祥遣  
使以地降壬寅正月上至南昌祥率衆來見封袁  
國公俾仍守舊鎮預征討尋率師取撫州等郡又  
從克武昌甲辰三月上遣使以書諭祥及江西守

將鄧愈曰贛州熊天瑞納款受賜不期背違初言  
輕擾地方理宜聲討今命袁國公將劉右丞黃叅  
政等軍馬盡數調遣悉聽總兵官鄧愈節制攻討  
未幾贛州平是時江右郡縣多叛祥與黃叅政彬  
討之參預有功

黃彬不詳其邑里元季以兵從徐壽輝攻略歲壬辰  
壽輝遣歐祥陷袁州遂命守禦以彬爲副將庚子  
陳友諒殺壽輝僭號彬亦屬焉明太祖旣破友諒  
拔江州至南昌彬率衆降授江西等處中書省叅

知政事握兵從征是年取新淦克復南昌且三月  
新周安山寨癸卯四月友諒悉兵圍南昌且三月  
守臣告急七月上帥彬及諸將往援遇寇兵於鄱  
陽湖大戰康郎山連勝之相持月餘友諒敗死其  
子理復奔武昌自立甲辰二月攻克武昌江漢諸  
郡皆嚮附以功進階中奉大夫贛州熊天瑞負固  
又從江西守將鄧愈袁國公歐祥將兵討平彬功  
爲多丙午丁未連鎮行省洪武元年六月江西諸  
山寨逋卒多逃竄爲民患詔彬統所部兵移鎮袁

州以招集之彬至下令有來歸願從軍者聽其補  
伍願還農者放免復業皆給糧以資由是遠近聞  
風來者不可勝計置袁州衛以隸之二年十二月  
賞守禦功賜白金文幣三年十一月大封功臣授  
開國輔運推誠宣力武臣榮祿大夫柱國封宜春  
侯食祿九百石賜鐵券仍賜文綺及帛二十疋詔  
討贛州上猶縣山寇十一年春詔與湯和率步騎  
駐臨清備邊未幾召還後數年卒

章富湖廣黃岡人歐祥部屬歸附後授袁州衛千戶

尋陞指揮僉事衛治初建多其績洪武二年以擒

宋赤腳功陞指揮同知九年調遼東金州

石原鳳陽定遠人明初從軍渡江授岳州衛百戶尋  
陞襄陽千戶洪武十七年以征雲南功陞袁州衛  
指揮僉事前後征廣東俘馘甚衆以疾卒子玉襲  
陞指揮使玉子偉通大義存恤士卒境內鎮靜尤  
樂事詩書以文濟武各所居堂曰思勲

邵昱合肥人父富明初從渡江以勲累進京衛指揮  
既老異代之授袁州衛中所千戶常領軍從征湖

南及兩廣蠻洞有功一日大祖念富父子忠勲召  
至京特晉階爲袁州衛指揮使俾掌印富遜石原  
子玉上嘉之遂世襲指揮同知

指揮余成卽余慶子宣德二年征交趾死之世襲

指揮周經死於陣贈都指揮僉事世襲

指揮刁琛父死於姚源難

國朝

流寓

游寓羈旅姓名必書以其人有足述故所在流聲  
亦曰君子之至於斯也邦之人弗敢忘也

戰國

藺相如史載趙人舊志爲萬載人宋令徐昇記縣治  
亦曰義烈慷慨則有若藺相如今萬載有藺家村

姑存疑以爲流寓

復詳辯相  
如宅下

晉

習鑿齒襄陽人爲桓溫別駕晉末秦苻瑍寇陷襄陽



鑿齒避地於萬載之山谷誦讀不輟後人各其山  
爲書堂山今分宜有習墓按晉書云襄鄧反正會鑿齒卒云塋此者莫詳  
又按晉史桓溫有異志鑿齒爲著漢晉春秋裁溫  
逆萌後以脚疾廢符堅陷襄陽聞釋道安與齒名  
爲輿而致之與語大悅曰吾破漢南得士才一人  
有半以病脚故云其居萬載以書堂名山則病廢  
之後不終爲堅所汚矣

唐

陶沔號竹溪六逸爲唐司空游萬載之東北村遂居  
焉卒後鄉人立廟祀沔世稱陶司空廟子孫居其  
地號陶家坊

楊希玘蘇州刺史父渾刺袁州有治聲朱泚反聞渾  
名欲致之因榜掠其子玘爲季子避居萬載之西  
江世家焉

曾文迪寧都人精天文地理讖緯內經諸書唐天祐  
時游袁愛萬載之西山謂其徒曰死塋我茲丘至  
梁貞明間終焉墓至今存元敖仲實立祠祀之翰  
林學士喬達記

宋

李觀南城人有文名仕太學說書范仲淹疏薦於朝

嘗寓袁適知州事祖無擇剗學靚爲作記卽世所稱三絕碑

陳瓘字了翁南劍人徽崇初以右正言權給事中上書攻章惇蔡卞又以書抵曾布言其過出知秦州尋治論復元祐皇后罪除名編管袁州移廉州

曹輔福州人宣和中爲秘書省正字上疏諫微行竄彬州六年移袁州居一年召爲校書郎靖康間官至尚書左丞同知樞密院事封福國公謚忠達

吳師古宜興人舉進士紹興初胡銓上書論和議乞

斬檜師古鋟其書以傳於金流袁州死

知浹汾州人通春秋左傳好直言岳飛待以賓禮飛下大理獄浹書訟其寃坐流袁州

洪皓字光弼饒州人紹興中使金不屈留十五年歸除徽猷閣直學士忤秦檜竄英州九年復朝奉郎徙袁州至南雄卒

辛竭字克勤號南坡居士其先爲開宣子仲甫之後以避難徙隆興性喜恬靜結廬西山之隅閉戶讀書郡守聘爲南昌山長登堂講肄尊尚程朱生徒

至者百數適與仲甫兄孟甫之孫玄感語及祖開  
宣任萬載墓歿葬龍山同歸祀祖遂居龍山下

元

譚觀字自廣南昌人性孝友工詩文元至順間詔設  
辟舉科令三品以下各舉所知薦爲經筵簡討賜  
進士出身授國史編修轉國子助教至正十八年  
乞休見陳友諒據江西諸路兵起避居萬載龍河  
之濱著隱詩以自適今後裔世居龍河橋側

鮑遇字千泗徽州人爲西臺御史與學士歐陽玄友  
善元主以鐵木迭兒輔導東宮遇疏劾不納遂乞  
休後徙萬載山中歐普祥屢聘不就俗傳其宅爲  
鮑家石云

明

楊子將泰和人少師文貞公士奇之父也元至正甲  
辰避兵於袁居二年生士奇於鳳凰臺側子將歿  
士奇甫週歲母陳夫人抱遺孤畱袁幾不能歸外  
祖陳庸躬涉艱險來挈子將之喪與陳夫人及其  
孤歸泰和時洪武元年也文貞初名寓字士奇一

字僑仲以僑寓宜陽故也子將累贈至少師兵部  
尚書兼華蓋殿大學士

國朝



